

OBRAZLOŽENJE UZ NACRT ZAKONA O ZAŠTITI OD BUKE

I USTAVNI OSNOV

Ustavni osnov za donošenje Zakona o zaštiti od buke je sadržan u odredbama člana 24. stav 1. tačka c) Ustava Tuzlanskog kantona, kojim je predviđeno da je u nadležnosti Skupštine Kantona donošenje zakona i ostalih propisa neophodnih za izvršavanje nadležnosti Kantona.

II RAZLOZI ZA DONOŠENJE ZAKONA

Osnovni razlog za donošenje Zakona o zaštiti od buke ("Službene novine Tuzlanskog kantona", broj: 10/04) je činjenica da je isti donesen prije donošenja federalnog zakona, te je nakon donošenja federalnog Zakona o zaštiti od buke („Službene novine Federacije BiH“, broj: 110/12) došlo do potrebe usklađivanja kantonalnog sa federalnim zakonom. Drugi razlog je potreba za preciznijim definisanjem inspeksijskog nadzora u ovoj oblasti.

III OBRAZLOŽENJE POJEDINIH ODREDBA

Članom 1. je definiran predmet Zakona.

Članom 2. su definirani pojmovi sadržani u Zakonu.

Članom 3. su definirani izrazi, skraćenice i jedinice mjere korišteni u tekstu Zakona.

Članom 4. su definirani najveći dozvoljeni nivoi buke prema tabelama koje čine sastavni dio Zakona.

Članom 5. su propisane mjere za zaštitu od buke.

Članom 6. je propisana nadležnost organa uprave kao i vlasnika izvora buke u osiguravanju zaštite od buke.

Članom 7. je definirano vrijeme provođenja mjera zaštite od buke kao i trajanje dužine dana i noći u smislu ovog Zakona.

Članom 8. je propisana obaveza za kantonalne, gradske i općinske organe uprave za izradu karata buke za određivanje, bilježenje i praćenje nivoa buke kao i definicija karte buke.

Članom 9. je propisana obaveza da se u prostornom i urbanističkom, te detaljnim planskim dokumentima odrede predviđeni nivoi buke na kartama odgovarajućeg mjerila kao i najviši dozvoljeni nivoi buke u skladu sa planiranim sadržajima i funkcijama u prostoru.

Članom 10. je propisano da svi postupci i studije, planovi i stručna mišljenja moraju osigurati da nivoi buke budu usklađeni sa odredbama Zakona u momentu puštanja u rad.

Propisano je da nadležni organi uprave u postupku izdavanja urbanističke suglasnosti za pogone i postrojenja, odnosno za sve djelatnosti za koje nije potrebno pribavljanje okolinske dozvole, propišu uvjete zaštite od buke u skladu sa ovim Zakonom.

Takođe je propisano da se nalazom i mišljenjem ovlaštenog pravnog lica dokazuje da, nakon izgradnje odnosno rekonstrukcije objekta koji je izvor buke, buka ne prelazi propisani najviši dopušteni nivo.

Članom 11. je propisana obaveza za pravna i fizička lica koja otvaraju gradilište da predvide i primijene mjere za sprečavanje širenja buke sa gradilišta iznad dozvoljenog nivoa.

Članom 12. je propisana obaveza za pravna i fizička lica da izvrše usaglašavanje zaštite od buke ukoliko djelatnost ili objekat proizvode buku iznad dopuštenog nivoa, a prethodno je izdato odobrenje za rad.

Članom 13. su propisani rokovi za usklađivanje zaštite od buke sa dozvoljenim nivoima buke i poduzimanje mjera radi zaštite od buke, te zaštita od buke koja nastaje na svim vrstama postojeće saobraćajne infrastrukture.

Članom 14. je propisana obaveza postavljanja adekvatne zvučne izolacije na novim i ranije izgrađenim objektima.

Članovima 15. i 16. je propisan nivo buke od akustičnih uređaja u zatvorenom i otvorenom prostoru, kao i uvjeti neophodni za korištenje tih uređaja u zatvorenom i otvorenom prostoru.

Članom 17. je propisana shodna primjena drugih zakonskih propisa kada su u pitanju granične vrijednosti emisija buke nastale korištenjem uređaja, strojeva, prijevoznih sredstava i drugih tehničkih uređaja.

Članom 18. je propisano izuzeće za prekoračenje Zakonom propisanog nivoa buke.

Članom 19. je propisana zabrana obavljanja radova i djelatnosti koji zbog prekomjerne buke ometaju noćni mir i odmor u naseljenim mjestima u vremenu od 22 – 06 sati kao i izuzeci od navedene zabrane.

Članovima 20., 21., 22. i 23. je propisano ko može vršiti mjerenje buke, način mjerenja, praćenje i kontroliranje nivoa buke na otvorenom i u zatvorenom prostoru.

Članovima 24. i 25. je propisano vrednovanje nivoa buke, te određeni standardi kojima je propisana zvučna izolacije razdjelnih zidova i stropova, kao i konstrukcija od zvuka udara, te standardi prema kojima se vrši mjerenje zvučne izolacije u zgradama i građevinskim elementima, za laboratorijska i terenska mjerenja, te mjerenja za svaki specifični slučaj.

Članovima 26. i 27. je propisan upravni i inspekcijski nadzor nad primjenom ovog Zakona i propisa donesenih na osnovu ovog Zakona, detaljno je propisano koje inspekcije obavljaju pojedine nadzore koje je propisao federalni zakon kao i nadležnosti inspektora.

Članom 28. su propisani propisani prekršaji i sankcije.

Članovi 29., 30. i 31. sadrže prelazne i završne odredbe, kojima je određeno da su sastavni dio ovog zakona tabele dopuštenog nivoa buke, da danom stupanja na snagu ovog Zakona prestaje važiti Zakon o zaštiti od buke („Službene novine Tuzlanskog kantona”, broj: 10/04), te da ovaj Zakon stupa na snagu osmog dana od dana objavljivanja u „Službenim novinama Tuzlanskog kantona“.

IV Finansijska sredstva

Za provođenje ovog Zakona nije potrebno obezbjeđenje dodatnih finansijskih sredstava.

P R E D L A G A Č

Vlada Tuzlanskog kantona